



SOALAN LAZIM (FAQ)

PROGRAM IMUNISASI INDUSTRI COVID-19 KERJASAMA AWAM-SWASTA (PIKAS)

A. SOALAN UMUM MENGENAI PIKAS

1. Apa itu PIKAS?

Jawatankuasa Khas Jaminan Akses Bekalan Vaksin COVID-19 (JKJAV) yang dipengerusikan oleh Kementerian Sains, Teknologi dan Inovasi (MOSTI) dan Kementerian Kesihatan (KKM) telah bersetuju supaya Program Imunisasi Industri COVID-19 Kerjasama Awam-Swasta (PIKAS) dilancarkan untuk melengkapkan Program Imunisasi COVID-19 Nasional (PICK) bagi mempercepatkan imunisasi Rakyat.

PIKAS ditujukan kepada pekerja-pekerja di sektor pembuatan yang mana MITI telah ditugaskan untuk menyelaraskan program imunisasi sektor pembuatan. Beberapa kementerian lain juga akan dipertanggungjawabkan bagi sektor masing-masing.

Objektif program kerjasama awam-swasta ini adalah untuk memudahkan usaha Kerajaan untuk mempercepatkan vaksinasi untuk Rakyat dan mencapai imuniti kelompok (*herd immunity*) dengan meningkatkan pengambilan vaksinasi di kalangan tenaga kerja di Malaysia dan mengurangkan bilangan kluster COVID-19 dalam kelompok tempat kerja. Ini akan melindungi kesejahteraan pekerja-pekerja dan seterusnya membantu mempercepatkan pemulihan ekonomi Malaysia.

PIKAS adalah program kerjasama awam-swasta yang **disokong oleh sektor swasta** yang bersetuju untuk menyediakan fasiliti di tempat kerja, pusat konvensyen dan pusat pameran sebagai Pusat Pemberian Vaksin (PPV) yang merangkumi kedua-dua perkhidmatan iaitu **kakitangan perubatan, bukan perubatan dan perkhidmatan keselamatan**.

2. Bagaimana cara untuk mendaftar dalam PIKAS?

Borang permohonan PIKAS boleh dimuat turun daripada laman web MITI. Borang yang lengkap diisi boleh dipanjangkan melalui persatuan industri dan persatuan perniagaan dan perdagangan ("persatuan perniagaan") kepada vaccine4industry@miti.gov.my.



3. Bilakah syarikat saya boleh mendaftar? Adakah tarikh akhir bagi penyerahan pendaftaran?

Pendaftaran akan bermula pada **13 Jun 2021**. Syarikat dikehendaki membaca FAQ, Terma dan Syarat Program serta memuat naik senarai pekerja (berdasarkan format yang boleh dimuat turun di laman pendaftaran).

Syarikat disyaratkan untuk memastikan semua pekerja mereka yang menyertai PIKAS telah pun berdaftar di MySejahtera untuk PICK.

Tidak ada tarikh akhir bagi pendaftaran PIKAS.

4. Siapa yang boleh memohon PIKAS?

Syarikat dari sektor pembuatan boleh membuat permohonan di bawah PIKAS. Sektor pertanian, pembinaan, perladangan dan peruncitan boleh merujuk kepada kementerian masing-masing seperti berikut:

- Pertanian - Kementerian Pertanian dan Industri Makanan (MAFI)
- Pembinaan - Lembaga Pembangunan Industri Pembinaan (CIDB), Kementerian Kerja Raya (KKR)
- Perladangan - Kementerian Perusahaan Perladangan dan Komoditi (MPIC)
- Peruncitan - Kementerian Perdagangan Dalam Negeri dan Hal Ehwal Pengguna (KPDNHEP)

5. Adakah vaksinasi diberikan secara percuma?

Vaksin adalah percuma. Pihak Kerajaan melalui Kementerian Kesihatan Malaysia (KKM) akan memberikan vaksin secara percuma kepada PPV.

6. Bagaimana PIKAS dilaksanakan?

Vaksinasi melalui PIKAS dilaksanakan melalui dua (2) model. Model 1 adalah vaksinasi melalui kemudahan PPV umum sementara Model 2 merujuk kepada vaksinasi di lokasi premis kilang/syarikat atau di lokasi yang dikenal pasti dan dipersetujui.

7. Adakah vaksinasi melalui PIKAS wajib bagi semua pekerja dan majikan?

Penyertaan PIKAS adalah secara sukarela. Syarikat dan pekerja adalah digalakkan untuk mendaftar untuk PIKAS bagi membantu mempercepatkan kadar imunisasi di dalam komuniti.



8. Bolehkah syarikat memasukkan tanggungan (ahli keluarga) pekerja dalam permohonan?

Tidak boleh, inisiatif ini adalah hanya untuk pekerja dan tidak melibatkan tanggungan, ahli keluarga dan rakan sekerja.

9. Bagaimana syarikat dan pekerja akan dimaklumkan sekiranya permohonan itu diluluskan?

Maklumat temujanji seperti tarikh dan lokasi vaksinasi akan dimaklumkan kepada pekerja melalui MySejahtera dan SMS. Wakil syarikat sepertimana yang didaftarkan dalam aplikasi akan dimaklumkan melalui e-mel.

10. Saya telah mendaftar untuk menyertai PICK melalui MySejahtera. Apa yang akan berlaku pada permohonan saya sekiranya saya memilih untuk menyertai PIKAS?

Adalah disyaratkan bagi pekerja untuk mendaftar untuk PICK melalui MySejahtera sebelum syarikat mendaftar untuk PIKAS.

Pekerja akan dimaklumkan melalui MySejahtera tarikh vaksinasi dan lokasi PPV di bawah PIKAS.

Sekiranya pekerja telah menerima tarikh vaksinasi lebih awal di bawah PICK, *AstraZeneca Opt-in Program* atau program lain, pekerja tidak akan dapat menerima vaksinasi di bawah PIKAS.

11. Saya telah mendaftar untuk mengambil bahagian dalam Program Imunisasi yang dianjurkan oleh Kerajaan Negeri. Adakah ini akan mempengaruhi permohonan saya di PIKAS?

Pihak Kerajaan telah memberi jaminan bahawa setiap orang yang mendaftar untuk vaksinasi layak divaksinasi tanpa mengira mana-mana Program Imunisasi.



12. Bolehkah saya menukar tarikh vaksinasi di bawah PIKAS setelah kelulusan diberikan kepada saya?

Anda digalakkan untuk mematuhi tarikh vaksinasi COVID-19 seperti yang dijadualkan di MySejahtera. Namun, sekiranya anda tidak dapat mengikuti program imunisasi pada tarikh yang ditentukan disebabkan perkara yang tidak dapat dielakkan, mohon dimaklumkan kepada KKM di talian 1-800-888-828 untuk menjadualkan semula tarikh tersebut. Ingin dimaklumkan bahawa tarikh vaksinasi hanya dibenarkan untuk dijadual semula sebanyak satu (1) kali sahaja.

13. Bolehkah saya memilih jenis vaksin untuk diberikan kepada saya?

Jenis vaksin yang diberikan akan dikenal pasti oleh Jawatankuasa Khas Jaminan Akses Vaksin (JKJAV) dan berdasarkan lokasi PPV.

Anda dikehendaki hadir di PPV mengikut jadual yang diberikan. Anda boleh menolak jenis vaksin yang akan ditetapkan selepas melalui proses pendaftaran di PPV.

Perlu diambil maklum bahawa anda hanya boleh menolak pemberian vaksin tidak lebih dari dua (2) kali. Selepas itu, nama anda akan dikeluarkan dari program imunisasi dan anda perlu mendaftar semula di MySejahtera sekiranya anda ingin turut serta dalam Program Imunisasi.

14. Siapa yang harus dirujuk untuk pertanyaan lebih lanjut?

Semua pertanyaan boleh ditujukan ke e-mel pikas.enquiry@miti.gov.my atau pusat panggilan MITI di:

- i. 03-62071193;
- ii. 03-62071194;
- iii. 03-62071195; atau
- iv. 03-62071196.

Waktu operasi adalah dari hari Isnin hingga Jumaat, 9.00 pagi hingga 5.00 petang.